



“

Hende pober
ta buska karni
pa nan stoma,
hende riku ta
buska stoma pa
nan karni

BONERIANO

EDITOR:
Bonaire Communication Services N.V.

Djabièrnè 11 april 2025 | Preis: \$1.25

KE MATA E GALIÑA DI WEB'I ORO?

Promé anochi festival kanto krioyo bon



Promé anochi Festival Kanto Krioyo djárasen tabata bon bishitá, hopi hende pa tende e kantikanan nobo krioyo. Djasabra ta bai tin e final pa saka e ganadó Kanto Krioyo 2025.



PA TUR BO
PIESA I TIRE
PA BO AUTO,
BUS OF TRUCK



KAYA CARLOS A. NICOLAAS | 717-6272

CHANGAN



MS201 DOUBLE
CABIN

f /dabboussimotors



Diskushon pa legalisá Mariwana ta sigui

KRALENDIJK- E diskushon sí por legalisá mariwana medisinal ta birando mas i mas fuerte. Resientemente konsehal Desiree (Daisy) Coffie a entregá un moshon pa

regulá i tolerá kultivo di mata di mariwana na Boneiru. Segun Coffie ta trata aki di mariwana medisinal, sinembargo e moshon riba su mes ta laga espasio pa interpretashon.

Diputado Nina den Heyer a bari e moshon aki kompletamente for di mesa. Pero opviamente e kos no a kaba aki. Awor ta sigui ku e diskushon den e siguiente reunion di Komishon Fiho.

Sigur ta interesante pa sa e punto di bista di demas konsehal mirando ku ainda niun hende a ekspresá nan opinion. Konsehal Hennyson Thielman a splika BONERIANO ku partido MPB sigur no ta sostené e idea aki. BONERIANO a aserká konsehal Benito Dirksz sinembargo e no a reakshoná.

Desaroyo na Hulanda

Miéntas aki, e diskushonnan ta kuminsá, na Hulanda e eksperimento di 'wiet' por nifiká fin di e maneho di toleransia.

E eksperimento nashonal di mariwana lo dreña e siguiente fase otro siman.

Na Hulanda ainda ta konta un maneho di toleransia pa mariwana,

benta ta permití, pero kultivo ta kastigabel i ta keda kombati tambe dor di polis i poder hudisial.

E meta di e eksperimento di mariwana di vários aña ta pa legalisá henter e kadena, for di kultivo te na uso. Tur tienda di kòfi den dies munisipio ta partisipando den e eksperimento, Arnhem, Almere, Breda, Groningen, Heerlen, Maastricht, Nijmegen, Tilburg, Voorne aan Zee i Zaanstad. En total, tin mas o ménos ochenta tienda di kòfi.

Na 2020, e asina yamá 'fase preparatorio', a inisiá. E eksperimento awor kasi a yega na e asina yamá 'fase eksperimental', den kual solamente por bende mariwana.



Kòrtamentu di orea na peliger

KRALENDIJK- Bon mirá, desaroyo digital i teknologia ta pone kòrtamentu di orea na peliger. Awendia ku un asina yamá app di cheating, bo por spioná bo partner pa haña sa kiko e ta hasiendo realmente. Bo por monitoriá su komportashon riba telefòn i kòmputr i asta sa sí e ta serka e 'byside'.

Ku un di e aplikashonnan akí fásilmente por spioná òf monitoriá e kòrtadó di orea. Enter otro Keyloggers. Ora download e software di keylogger riba un kòmputr, e ta registrá tur loke un usuario ta hasi riba e kòmputr: kada batimentu di tekla, klik di mouse, òf kada wèpsait bishitá i kada página di kòmbersashonnan online. Tur e informashon aki ta keda wardá den un file ku por mira despues.

Esaki ta permití e spion sibernético pa rekohé tur nòmber di usuario, kontraseña i number di tarheta di krédito introdusí den e kòmputr. Spyware ta permití un hende pa sekretamente monitoriá i graba e aktividat di telefòn di e persona dirigí. Ademas di historia di yamada i lokalidat di telefòn, e usuario di spyware por usa un app pa wak mensahenan di teksto mandá i risibí, potrèt i videonan saka i wèpsaitnan bishitá. Un hende mester tin aksesu na bo telefòn pa instalá spyware, pero e ta kore den modo sigilo sin notifikashon, òf aktividat di identifikashon. E por ta difisil pa detektá òf kita.

Un GPS tracker pegá na bo outo ta permití ken ku a pone esaki einan pa sigui unda bo ta bai den e outo ei. GPS trackers ta barata i fásil pa usa.

Nan por ta skondí kasi tur kaminda den un vehíkulo. Ku un GPS tracker aktivo, ta mustra e lokalidat aktual di e outo riba un mapa ku por aksesá via e app asosiá. Un tracker pasivo no ta permití e usuario pa sigui kada moveshon di e usuario. En bes di esei, e usuario mester kue e aparato i download e informashon wardá riba un kòmputr.

Aplikashonnan di spionahe di medionan sosial. Tin vários app disponibel ku ta permití hende spioná riba Facebook, Facebook Messenger, òf otro appnan di medionan sosial i tin biá asta monitoriá yamadanan di telefòn, email i mensahenan di teksto di un meta.


Legal of nò?

Ta ilegal si bo partner ta monitoriá bo asuntunan? Tur hende tin

privasidat, pero sí bo ta kasá òf ta biba huntú, e privasidat ei ta bira hopi ménos. E ora ei bo mester spera ku bo partner sa kosnan di bo, òf pa nota kosnan ku en realidat bo lo preferá di tene privá. Pues e situashon ta bira basta difisil pa definí sí ta trata di un akshon ilegal. Especialmente si bo ta kasá den komunidat di propiedat. Al fin i al kabo,

e ta bo propiedat konhunto riba kua bo ta instalá e ekipo di grabashon. I bo no por hack den bo mes kòmputr. Uso di password di un otro hende ta formalmente kastigabel komo hacking di kòmputr. Pero aki atrobe, e mester ta trata di uso ilegal. Pues si bo partner hasi tur esaki, ainda ano por definí ku el a kibra ku lei.

Yuda nos tene nos playanan limpi



www.extraboneiru.com

KE MATA E GALIÑA DI WEB'I ORO?

KRALENDIJK- Ainda Kolegio Ehekutivo no a sali dilanti i tuma un posishon kla den e debe entre Boneiru i 3 aerolínea merikano. E situashon ainda ta preokupante. Despues ku e situashon aki a sali na kla asociashon di hotèl i turismo, BONHATA tambe a sali bati alarma. Tempu ta urgi i tur kos ta indiká ku finalmente gobièrnu mester paga e sumanan habrí. Awor ta teme sí gobièrnu paga e suma, pa e no deskontá esaki riba

e supsidio di Ofisina di Turismo (TCB). Lokual por perhudiká e organisashon aki finansieramente.

Regie Carolina, kende ta hefe di Departamento di Finansa di Entidat Públiko Boneiru ta insistí ku TCB a firma algun kontrakt konserní garantia di asientonan den avion. Pero esaki ta kontrakt netamente entre TCB i e aerolínea. Gobièrnu no tin niun debe ku e aerolíneanan.

Sinembargo tin un desishon di 17 di mei 2023

den kua Kolegio Ehekutivo ta outorisá TCB pa sera akuerdo ku e areolinenan. BONERIANO a bolbe aserká Carolina, pa sa sí gobièrnu ta dispuesto na paga òf nò, pero awor e no a reashoná.

E sektor di turismo ta generá 16 mion dòler pa aña ku ta bai direktamente den kaha di gobièrnu. Bon mirá,

gobièrnu tin e sèn pa paga e aerolíneanan. Ta konosí ku TCB ta kontinuamente den un lucha ku gobièrnu pa oumentá montante di supsidio. TCB ta bisa ku nan no tin sufisiente sèn pa hasi merkadeo pa atraé turista. Esaki a pone ku te ku awor, apénas a hasi uso di merkadeo pa e rutan pa kua a primintí miónes na

garantia na kompanianan di aviashon manera WestJet, United i JetBlue. Sin sufisiente promoshon, e stulnan ta keda bashí i mester paga kasi henter e suma di garantia. Ku tur e konsekuensianan ku esaki ta trese kuné.

Awor e pregunta ta surgi, ku e akitut aki, gobièrnu ta kòrta den su propio dede?

Tayer restourashon di koral ta fortalese koperashon entre islanan den Karibe

KRALENDIJK -- Di 31 di mart pa 4 di aprel, a tuma lugá na Boneiru un tayer intensivo tokante restourashon di koral, organisá pa Reef Renewal Bonaire (RRFB). E enkuentro ku a dura un siman, a trese huntun eksperionan di restourashon di henter Karibe Hulandes, inkluyendo representantenan di Reef Renewal Curaçao, Saba Conservation Foundation i ScubbeBubbles Foundation di Aruba. Meta di e tayer tabata pa kompartí konosementu, mehorá téknikanan di restourashon i promové koperashon regional riba tereno di restourashon di koral. Partisipantenan a risibí presentashonnan diario i a kolaborá durante seshonnan di tereno na sitionan di rekuperashon aktivo di RRFB. Durante e seshonnan aki a diskutí i apliká vários téknika, manera

mikro-fragmentashon di koral, propagashon di koral di kandela, fotogrametria i edukashon. Partisipantenan a kompartí nan eksperensianan i lèsnan siñá for di proyektonan anterior di restourashon riba nan islanan i a eksplorá oportunidatnan nobo pa mehorashon.

Ernst Noyons, hefe di operashon di RRFB, a enfatisá e importansia di e kolaborashon aki: "Restourashon di koral ta un proseso kontinuo ku ta evolucionando konstantemente. Ta krusial pa nos komo region evolucioná tambe. Dor di trese timnan di e diferente islanan huntun, nos no solamente ta fortalese konosementu i eksperensia, pero tambe ta oumentá e kapasidat di otro na e retonan di medio ambiente ku nos ta enfrentá."

E tayer aki ta un paso

importante den RRFB su strategia a largu plaso pa fortalese e koperashon entre e islanan. Dor di agrupá ekspertisio i rekursonan, RRFB ta spera di desaroyá un aserkamentu mas kordiná pa restourashon di koral ku no solamente por atendé menasanan lokal manera blankeamentu di koral i malesa, pero tambe haña solushonnan sostenibel pa konservashon di refnan di Karibe.

Den futuro, RRFB tin komo meta pa sigui ekspandé su ret pa medio di tayernan, interkambionan di tereno i inisiativanan di investigashon konhuntun. Dor di intensifiká koperashon entre e islanan, RRFB ta spera di por aselerá efektividat di proyektonan di restourashon di koral den Karibe i asina tin un impakto mas grandi riba konservashon di refnan di koral di e region.

Consuelo Memorial "Bo Consuelo den tempu difisil"



Hetty Yvonne Burgos

*Willemstad, 03-04-1947 · †Kralendijk 08-04-2025

(dochter van Aloysia Burgos-Hugoosgift en Bromley Williams, stiefdochter van Johan Burgos)

Met verdriet, maar ook berusting nemen wij afscheid van onze moeder, grootmoeder, schoonmoeder, zuster, nicht, tante en vriendin.

Claudette, Aimée en John Abel
Familie Burgos
Familie Williams
Familie Rodrigues
Gerard Kempers en familie

Afscheid op zaterdag 12 april 2025 van 10:00 -12:00 uur bij Consuelo Memorial te Kaya Maria C. Hellmund – Boom nr. 11 Bonaire CN

Jesaja 41:10 "Wees niet bang, want ik ben bij je, vrees niet, want ik ben je God. Ik zal je sterken, ik zal je helpen, je steunen met mijn onoverwinnelijke rechterhand."

Correspondentie: claudette.abel@gmail.com



HUSTISIA



Ministerio Públiko ta persiguí eks polis

KRALENDIJK - ta persiguí eks polis trata aki di e insidente ku Ministerio Públiko (OM) Gideon R.P.M. (30). Ta a tuma lugá 1 di yanüari



Trahadó ta saka kuchú pa hefe

KRALENDIJK- Korte den Promé Instansia a atendé e kaso penal kontra e hòmer Alci A. (55) apesar ku e no tabata presente. Ta trata aki di un insidente ku a tuma lugá kasi 2 aña pasá. Ministerio Públiko (OM) ta akusá e di maltrato i menasa.

Promé ku a kuminsá ku e kaso hues a kontrolá sí a entregá e dagfar korektamente na e akusado. Fiskal a splika na momentu ku a bai entregá e dagfar na e akusado a topa ku su mama. E mama a bisa ku Alci ya no ta na Boneiru i e no sa ki dia e ta regresá. Fiskal a konstatá ku ya Alci

a kita su nòmber for di aki i no tin un adrès konosí. Pues a plak e dagfar.

E kaso

Dia 16 di yùni 2023 Alci tabatin problema ku su mèneder. E situashon a eskalá i el a saka kuchú i bisa: “Mi ta hinka bo mata.” Hues a haña e akusashon probá mirando ku Alci mes a atmití den su deklarashon na polis. Tambe tabatin un testigu di e suseso. Hues a haña ku tabatin motibunan pa e eskalashon. “Aparentemente e mèneder no a papia masha nèchi kuné. Esaki no ta

bon specialmente den un supermerkadu ora tin yen di hende”, hues a agregá.

Korte den Promé Instansia a kondená Alci A. na un kastigu k o m p l e t a m e n t e kondishonal di 1 siman ku un periodo di prueba di 2 aña.



2024 na Saba durante kua e polis a saka su arma reglamentario den un estableimentu di horeka. Video di insidente aki a bai viral i a kousa basta konmoshon den komunidad di Saba. Konsekuentemente Reshèrshi di Reino a kondusí un investigashon ku a resultá finalmente den retiro di e polis.

Awor OM a hiba e kaso den Korte. Formalmente ta akusá Gideon di 2 echo kastigabel. Menasa ku un arma di kandela i perhurio.

Dikon perhurio?

Un persona ta kometé perhurio na momentu ku deliberadamente e ta gaña bou di huramentu. Un polis ta kometé perhurio na momentu

e traha un prosèsferbal sin ku esaki ta basá riba bèrdad. Den e kaso aki, segun e dagfar Gideon a traha un prosèsferbal di e insidente ku no ta kuadra ku e bèrdad. El a skirbi entre otro ku un persona deskonosí a agredié, a tuma poseshon di kombate i manda bòter riba dje.

Mester menshoná ku perhurio ta kastigabel pa lei i ta ankrá den artíkulo 213 di nos Kódigo Penal. Un hende por haña máksimo 6 aña kastigu di prizòn sí e kometé perhurio. Korte den Promé Instansia ainda no a atendé e kaso kontra Gideon R.P.M. pa motibu ku e tabata malu. Awor a posponé e kaso. Ta trata e kaso aki 3 di yùli próksimo.

Korte a bai ‘Kennisweek’

Tratamentu di kasonan posponé

KRALENDIJK - E siman aki no tin tratamentu di kasonan den Korte.

Esaki pa motibu ku e huesnan i e griffiènan a biaha pa Kòrsou pa un asina yamá Siman di Konosementu, lokual nan ta yama na hulandes ‘kennisweek’. Durante e siman aki Korte Komun di Hustisia

den su totalidat, pues di Kòrsou, Aruba, Boneiru, Statia, Saba i St. Maarten ta bini huntu.

E intenshon ta pa entre otro pasa riba hurisprudensianan.

Na momentu hues i griffiènan regresá Boneiru, lo reanudá tratamentu di e kasonan.

POLÍTICA

Riba kua planeta miembronan di Konseho Insular di Demokrat ta biba

Tur kaminda ku bira ta tende ku kosnan ta stanká

KRALENDIJK -- Frakshon di MPB, pa medio di Hennyson Thielman, a tuma nota di algun komunikado ku miembronan di frakshon di Demokrat. “Nos ta puntra nos mes, ta riba kua planeta e hendenan aki ta biba. Nan no ta skucha tur e reklamonan ku tin den tur skina ku bo bira na Boneiru. Ora ku bo mira e kantidat di biá ku e hendenan akí ta subi avion pa bai keiru, uzando sèn di pueblo, e ora ei bo ta kaba komprondé ku ta p’esei nan no sa ta kiko ta pasando riba Boneiru, pasobra kasi nunca nan no tei.” Den un di e komunikadonan, segun Thielman, el a lesa algu ku a pasa pa promé biá den historia. Gobièrnu ta broma ku nan a basha poko tera riba algun kaminda. Drechamentu di kaminda ku greis ta algu ku tur tempu tabata

sosodé strukturalmente i outomátikamente. Pa e gobièrnu akí si ta un logro grandi. Komprendibel, pasobra nada ta pasando i ta esei so a keda pa broma kuné.

Organisashonnan lokal ta sklama

Thielman ta di opinion ku Frakshon di Demokrat mester stòp di kue direkshon di aeropuerto i duna direkshon na Gobièrnu. Lo ta bon pa frakshon di Demokrat tuma tempu i sinta ku organisashonnan i atendé ku problemanan serio ku Boneiru ta konfrontando. Stòp di sinta hasi prèt, manda komunikado pa oposishon. Bai atendé ku dolónan di pueblo manera PISKABON, BONHATA, kompanianan di konstrukshon, sektor di kultura, Diálogo Sentral, Cft, prensa, gruponan di

dragrace, shofùrnán di trùk, ku ta reklamá.

Pa koroná obra, ta manda piskadónan subi waf pa bai buska nan pan di kada dia, pero riba nan propio responsabilidad pasobra e waf pa kai den otro, segun Thielman.

Preis di kuminda i koriente impagabel

Thielman ta musta ku preisnan den supermerkadu ta subiendo drástikamente. Tin hende ku mester di dos trabou pa por sobreviví. Awor te asta ta mira hende ta kana ku calculator den man ora di hasi kompra pa nan konta tur kos bon, sperando ku nan tin suficiente sèn pa por kumpra tur loke ku nan mester. Muchanan ta sintá den outo pafó di supermerkadu, pasobra

mamanan sa ku si e yu baha ora nan ta hasi kompra, e yu ta bai pidi mangel, pero e sèn no ta yega pa kumpra nada èkstra. Awor ku e tarifanan di importashon di Trump, mas ainda ta teme kiko lo bira e desaroyo di preis di kuminda diario.

Pa hasi e situashon di famianan pió, di akuerdo ku Thielman, preis di koriente a bira dòbel na komienso di e aña akí. Un hende ku ántes tabata paga 100 dòler pa koriente, awor ta paga 200 dòler. Esakinan ta puntonan ku Demokrat mester bai atendé kuné i stòp di kore tras di oposishon.

Proposishon pa baha preis di koriente

Loke ku e gobièrnu anterior tabata hasi, segun Thielman, ta proponé pa

sigui kuné ta bin ku un supsidio di parti Gobièrnu di Boneiru pa baha preis di koriente pa asina trese un alivio. Esaki ta algu ku a yega di sosodé na aña 2022 kaba, tempu ku Gobièrnu a duna un supsidio na WEB pa baha preis di koriente. Tambe bin ku un makutu básiko ku preis máksimo i asina trata na frena e subida di preis di kompra.

Si Gobièrnu no hasi nada, frakshon di MPB lo bin ku un proposishon pa pone un supsidio pa WEB pa baha preis di koriente. No por laga preisnan sigui subi asin’aki i keda sin hasi nada. Thielman ta spera ku otro miembronan tambe lo para tras di e inisiativa akí pa yuda pueblo i stòp di bin ku weganan polítiko ku no ta yuda pueblo ku nada.



Center Body Car Polo N.V.

ta buska

- 1 spuiter

Pa mas inf. por yama

717-6590

Pronóstiko di tempu pa Boneiru



Djaweps 10 te Djabièrnè 11 April 2025

Parsialmente nublá ku posibilidat pa algun áwaseru

Ta parsialmente nublá ku posibilidat pa algun áwaseru. E temperatura máksimo lo ta aproksimadamente 31°C, e temperatura mínimo mas o ménos 26°C. Bientu for di direkshon ost ta moderá te basta fuerte, 4 te 5 Bft.

Altura di ola: aproksimadamente 2.0 m (6-7 pia) . Altura di ola lo disminuí mañan te 1.5-2.0 m (5-6 pia).

* Altura di ola válido pa laman grandi

Pa tèst kanser na tripa

Investigashon di poblashon ta kuminsá

KRALENDIJK – E luna akí ta kuminsá ku e di tres investigashon di poblashon relashoná ku kanser na Boneiru i e promé den kua hende hòmbler tambe por partisipá. Ta ofresé tèst di kanser na tripa na tantu hende hòmbler komo hende muhé, entre e edatnan di 55 i 75 aña.

Tur hende den e grupo

di enfoke lo risibí un karta di invitashon denter di dos aña, despues di kual nan por inskribí pa partisipá.

Si no a risibí un invitashon, pero tòg ke partisipá, tuma kontakto ku e organisashon di tèst. Partisipashon ta grátis.

Pa mas informashon tokante kanser na tripa i e importansia

di detekshon tempran, por tuma kontakto ku e organisashon di tèst òf dòkter di kas pa esaki. Por tuma kontakto ku e organisashon di tèst via number di telefòn (+599) 715-9200, WhatsApp (+599) 781-0476, òf via e-mail screeningCN@rivm.nl i via e wèpsait: www.screening-cn.com.



Adaptashon orario di RBC

KRALENDIJK -- RBC Royal Bank N.V. ta anunsiá ahuste den e oranan di operashon na su brèñch. E kambio akí ta aliniá ku e nesesidatnan i preferensianan kambiando di su klientenan i di konsumidónan, pa sigurá un eksperensia konsistente pa su klientenan i na mes momento mehorá e lugá di trabou pa su empleadonan.

Entrante djaluna, 5 di mei e siguiente oranan di operashon nobo ahustá na e brèñch na Boneiru ta, di djaluna pa djabièrnè di 8'or di mainta pa 3'or di atardi. Mas i mas kliente i konsumidó ta preferá e komodidat di opshonnan di selfservice pa nan transakshonnan finansiero di kada dia, i ta hasiendo uso di servisio bankario digital i servisio di ATM, miéntras ku nan ta probechá di e sosten

personalisá na e brèñch pa konseho finansiero mas kompleho, manera kompra di kas òf outo, invershon pa penshun, òf sparmentu pa edukashon di nan yunan.

RBC lo sigui enfoká riba mehorashon di su kanalnan, teknologia i talento. E banko a hasi invershonnan signifkante den su kanalnan di selfservice i a progresá riba tereno digital, hasi bishitanan na e brèñch mas rápido, mas fásil i mas efisiente pa klientenan, mehorando e eksperensia di kliente.

RBC su diferente kanalnan di distribushon ta sigurá ku klientenan por kontra ku e banko na kada ora, tur kaminda i ora ta kumbiní nan i haña sosten ku nan nesesidatnan i nan metanan finansiero a base di fleksibilidat i sigun nan propio eskoho.

Tambe, RBC ta spera ku e kambionan akí lo mehorá e ambiente di trabou pa su empleadonan, di moda ku nan por sirbi kliente ku dedikashon, atenshon i enfoke i asina kontribuí na kompromiso di empleado, alabes dunando e mihó eksperensia pa su klientenan.

Kampaña pa músiko i otro hende registrá durante Kanto Krioyo

KRALENDIJK – Durante Kanto Krioyo, Sekshon di Kultura Arte i Literatura, (SKAL), ta bai registrá tur bailadó, eskulptor, kantante, músiko, pintor poeta i otro artista na Boneiru. Lema di e kampaña akí ta Kultura ta mi – Registrá i laga sa ken bo ta! Di e forma akí SKAL ke inventarisá i registrá tur talento creativo na Boneiru. Ta usa e registrashon pa yega na un archivo digital kultural. SKAL lo por hasi bon uso di e archivo akí na ora ku mester di artista pa kalke evento por ehèmpel.

Festival 'Kanto Krioyo' ta tumá lugá di 9 te ku 12 di aprel. SKAL ta pone e dianan ei un lugá fiho den públiko kaminda tur artista por registrá.

Kolaboradónan di SKAL ta kana den públiko tambe pa parti flyer i formulario pa registrá. Tur artista por registrá mesora durante 'Kanto Krioyo' òf skohe pa registrá despues ku nan selular usando un QR-code. Kada artista ku registrá ta haña un tishùrt di 'Kultura ta mi.'

SKAL ta invitá henter komunidad pa bai apoyá nos músiko i kantantenan ku ta partisipá na Kanto Krioyo. E evento ta tuma lugá na stadion Antonio Trenidat na Rincon. Pa mas informashon òf pregunta tokante 'Kultura ta mi' por tuma kontakto ku Segni Bernadina, coach kultural, +5997175330 òf +599 796567, òf segnibernardina@bonairegov.com.

Gerez N.J. Multifunction B.V.

ta buska

- 2 timmerman

- 7 metselaar

Pa mas inf. por yama **+599 787-3758**

Yuda nos tene nos playanan limpi



www.extraboneiru.com



Corendon ta selebrá ku tatuaje

KRALENDIJK -- Spòternan di avion por bai yag awor ku Corendon a proveé un di su Boeing 737-9MAX, registrashon PH-CDQ, ku un toke spesial pa selebrá su di 25 aniversario. E desvelo festivo a tuma lugá e siman akí na Schiphol den hangar 14. E diseño ta kreá pa Henk Schiffmacher, un di e artistanan di tatuaje mas famoso di Hulanda.



Despues di e desvelo festivo di e 737 i despues ku e invitadonan por a tira un bista paden di e avion, a zuai despedí di dje, pero tambe Berget Lewis a kanta.

Despues di a sali for di e hangar, e avion a bai rumbo pa e porta pa su promé destinashon, Antalya, tambe konosí komo e pèrla di e riviera Turko.

Corendon, fundá na 2000 pa Atilay Uslu i Yildiray Karaer, ta un spesialisista den biahe aéreo pa Turkia. E kompania a krese bira un di e operadornan di tour mas grandi na Hulanda, ku un kantidat grandi di destinashon, su propio hotèlnan na Hulanda, Turkia i Kòrsou i vários supsidario.

Gunay Uslu a regresá na e negoshi di famia Corendon dia 11 di desèmber 2023, kaminda e ta traha awor komo CEO. For di 10 di yanüari 2022 te ku 1 di desèmber 2023, e tabata Sekretario di Estado pa Kultura u Media na nòmber di D66 den e gabinete Rutte IV. Durante su partisipashon den e programa Casa di Beau di Erven Dorens, Gunay a konosé e rei di tatuaje

Henk Schiffmacher.

E kolaborashon ku a resultá a resultá den e diseño di un vas ku a keda presentá na klientenan fiel di Corendon na okashon di Corendon su di 25 aniversario.

E PH-CDQ a keda entregá na Corendon Dutch Airlines dia 15 di novèmber 2023. E flota di e kompania di aviashon ta konsistí di dos otro Boeing di e mesun tipo, e PH-CDP i CDR i dos Airbus A350, e EC-NTB i e EC-NCF. Pa e último dosnan, ku ta hür for di e World2Fly Spañó, Corendon a introdusí e zona solamente pa adulto, ku por reservá pa pasaheronan di 16 aña bai ariba.

Awor, e kompania di aviashon di aniversario a agregá un buelo èkstra ku e tipo di avion akí pa Kòrsou na e skema eksistente. E motibu di esaki ta e demanda kresiente pa dlanan di fiesta riba e islanan Karibense.



Kampamentu solamente for di 13 te ku 23 di aprel

KRALENDIJK -- Entidat Públiko Boneiru ta anunsiá ku ta pèrmít kampamentu na sitionan públiko solamente entre 13 i 23 di aprel 2025. Despues di 23 di aprel mester a eliminá tur sitio di kampamentu

kompletamente.

Tur persona ku ta kampa mester registrá adelantá na Selibon na Kaya Industria 20. Sin registrashon no tin mag di kampa. Na momentu di registrashon un prueba bálido di identidat ta obligatorio, i un persona

di kontakto di e grupo di kampamentu tin ku firma e instrukshonnan.

E personanan ku ta kampa tin obligashon pa separá nan sushi den sinku kategoria: karbon, plèstik, glas, bleki i restu di sushi.



Hermenegilda Anthony den Herensia

KRALENDIJK -- Desde djárasen por mira Hermenegilda Anthony den e programa Herensia na Bonaire.tv. E ta mas konosí bou dje nòmber Chichi. Despues di un karera largu den aparato gubernamental, trahando na ofisina di Ontvanger, Chichi ta disfrutando awor di su penshun, pero e no ta sinta ketu. Chichi a nase i lanta den e bario Rincon komo yu di Benny i Martina Anthony. Despues komo hóben el a bai biba na Kòrsou, na unda el a studia.

Banda di su trabou Chichi tabata hopi aktivo den e bida sosial i kultural di Rincon. Asina por mensioná ku pa hopi aña e ta miembro di Kanta Orkidia. Mas aleu e ta hopi aktivo den e bida di 'scouting' den su bario.

E programa Herensia ku Chichi, kende a nase dia 16 di aprel 1939, ta pasa awe djabièrnè anochi pa 8'or na Bonaire.tv, visibel riba kanal 23 di Flamingo TV i 70 di Telbo. Mañan djasabra pa 8or di mainta e programa aki ta ripití.



Komandantenan di kuerpo di bombero ta reforsá kolaborashon

KRALENDIJK -- Komandantenan di kuerpo di bombero Kòrsou, Aruba, Sint Maarten i Hulanda Karibense (Boneiru, Sint Eustatius i Saba) a reuní siman pasá pa un enkuentro di dos dia. Bombero Hulanda i Akademia di Reino di Bombero di Bombero tambe tabata presente. Durante e enkuentro nan a papia tokante reforsá e kolaborashon i a sera akuerdo nobo pa futuro.

E laso di kolaborashon entre e kuerponan di bombero den e parti Karibense di Reino ta kumpli dies aña e aña

aki. Den e periodo ei, e kuerponan a kolaborá intensivamente riba tereno di entrenamentu, seguridat, yudansa den kaso di desaster i desaroyo di lidernan den kuerpo di bombero

Durante e enkuentro, e komandantenan a diskutí kon ta mihó paharmonisá entrenamentu i kualifikashon di personal di kuerpo di bombero. Esaki lo hasi mas facil pa interkambiá personal di kuerpo di bombero temporalmente. Asina nan por gana eksperensia òf yuda otro den situashon di emergensia.

Nan a papia tambe tokante un entrenamentu konhunto pa kontroladónan di prevenshon di kandela. Den esaki, e kuerponan ta kompartí konosementu i eksperensia ku otro i ku Hulanda. Ademas, a sera akuerdo tokante sosten rápido despues di un orkan. Por transportá personal di kuerpo di bombero rápidamente pa e área afektá pa duna yudansa.

Pa habitantenan di Boneiru, Sint Eustatius i Saba, e kolaborashon ku e otro islanan den reino ta nifiká tambe si e kuerpo mester di sosten di koleganan di otro isla.



Programanan di Bonaire.tv

TELBO kanal 70
Flamingo TV kanal 23

Djabièrnè 11 aprel 2025

12.00 Herensia:	Bernadino Beaumont
13.00 Aki Boneiru:	Nemencio Beaumont
14.00 Herensia Siglo 20:	Leon Candido Anthony
15.00 BAPA:	Chaira Borderslee
16.00 Aktualidat:	288 Jay Haviser i Lauriane Ammerlaan
17.00 Aki Boneiru:	Richard Lopes
18.00 Herensia Siglo 20:	Anton Anthony
19.00 BAPA:	Anthony Cecilia
20.00 Herensia:	Hermenegilda 'Chichi' Anthony
21.00 Aki Boneiru:	Win Offerman
22.00 Herensia Siglo 20:	Julio Herrera
23.00 BAPA:	Alison Isebia



Tur mèrdia 12'or ta kuminsá un programashon nobo di 4 ora. E programashon aki ta ripiti pa 24:00.

KURASON TA E FUENTE DI BIDA

Skritura: Proverbionan 4

Warda bo kurason riba tur kos, pasobra e ta e fuente di bida. Proverbionan 4:23(BS)

Salomon, eskritor di Proverbionan, ta ripití e palabranan: Mi yu(nan), tende i paga atenshon na tres okashon den e Skritura di awe (versikulonan 1, 10 i 20). Ripitishon semper ta pidi pa atenshon èkstra.

Ora mayornan ke pa e yunan ta na altura di algu importante i pa nan keda kòrda, nan ta ripití. Aki Salomon ta papia en general ku yunan.

Versíkulo 1 ta instruí pa yunan tende instrukshon di tata i paga atenshon pa nan haña komprendementu. Ke men obedesé mayornan i buska bon siñansa.

Versíkulo 10, pa aseptá mi palabranan i añanan di bo bida lo ta hopi. Onra bo tata i bo mama ..., pa bai bo bon i pa bo tin bida largu riba tera. Efesionan 6:2-3.

Versíkulo 20, pa paga atenshon na mi palabranan; inkliná bo orea na loke mi ta bisa. Aki un tata kasi rogando su yu pa tene duru na loke e ta papia.

Tarea di mayornan no ta kaba nunca. E ta un proseso kontinu.

Kurason ta e fuente di bida. P'esei ta importante ku e ta bon. Si e fuente ta bon, e ta saka loke ta bon. E bon hende, for di e bon tesoro di su kurason, ta saka loke ta bon; i e mal hende, for di e mal tesoro, ta saka loke ta malu; pasobra for di e abundansia di kurason su boka ta papia. Lukas 6:45.

E desishon mas importante ku yunan mester tuma ta salbashon den Kristu-Hesus. Asept'É komo nan Salvador. Esaki ta deseo primordial di mayornan, p'esei nan ta sigui ku nan tarea.

Un kurason ku Hesus komo e fuente, ta e mihó fuente di bida!

Gilda Beukenboom-Sintjago
Produkshon PGM

Eksitoso siman di trabou rònt ayudo i kolaborashon finansiero

KRALENDIJK -- Di 24 pa 28 di mart, Direktorado di Komunitat i Kuido di Entidat Públiko Boneiru, den kuadro di e plan di programa 'Trahando pa Prosperidat i Bienestar di Boneiru', a organisá un eksitoso seshon di trabou.

For di e plan di

programa a lanta diferente tim di tarea, entre otro e tim di tarea 'Debe'. E tim di tarea 'Debe' ta konsistí di e konsehero di maneho di Entidat Públiko Boneiru, Departamento di Trabou Sosial Finansa di Sentro Akseso, konseheronan di maneho di Ministerio di

Asuntunan Sosial i Empleo, SZW i NVVK, e asosiashon di sektor di mas grandi pa ayudo na momentu di debe i servisio finansiero for di aña 1932 na Hulanda.

Meta di e siman di trabou akí tabata pa 'brainstorm' tokante e metanan riba término kòrtiku, manera yega na un módulo relashoná ku atmishon i registrashon, señalamentu tempran, stabilisashon i areglo di pago.

Seguidamente a 'brainstorm' tambe tokante prosesonan di trabou pa guia finansiero i kolaborashon entre dunadónan di ayudo riba tereno finansiero i kreditornan.

E metanan ta pa riba término kòrtiku yega na un kombinio den kua a stipulá kolaborashon, riba término mediano yega na un ordenansa insular i riba término largu yega na un legislashon, di manera ku e habitante ta haña oportunidat pa un futuro liber di debe.

Na luna di òktober 2024, NVVK a hasi un bishita di trabou na Boneiru. For di resultado di e investigashon di NVVK, a resultá ku debe ta surgi na Boneiru debí na adaptashon, sobrebibensia, kompensashon i gastamentu di mas.

Durante e siman di trabou akí a organisá tambe un seshon di trabou híbrido ku e suministradó di koriente Eneco, huntu ku e kreditornan.

Banda di esaki, relashoná ku guia finansiero di siudadanonan na Boneiru, Departamento di Trabou Sosial Finansa di Sentro Akseso, a presentá nan resultadonan eksitoso.

Ku un bista bèk riba un siman di trabou produktivo, e tim di tarea 'Debe' ta bai enfoká riba eksplorashon di solushonnan alternativo pa problemanan di debe, pa medio di plannan bon elaborá.



FUHIKUBO TA PRESENTA

Siklo di Charla Frans Booi

Tur di tres djamars di luna

Edishon nr. 4:
Bida di kunuku
- Rudsel Mercelina

15 di april
6or pa 8or di anochi

FUHIKUBO
FUNDASHON HISTÓRIKO
KULTURAL BONEIRANO

het Cultuurfonds
Caribisch Gebied

èxtra
...number 1

www.extraboneiru.com



Na Kaminda Pa Dia di Rincon

Minüt di silensio na honor di Pandjuwa

Promé anochi festival kanto kriooyo

KRALENDIJK -- Promé anochi Festival Kanto Kriooyo djárasen 9 di aprel tabata bon bishitá, hopi hende pa tende e kantikanan nobo kriooyo. Djasabra ta bai tin e final pa saka e ganadó Kanto Kriooyo 2025.

Kantikanan bon a zona e promé anochi, pues djasabra por spera mas kos kayente manera ta bisa.

Agrupashon musikal FMK a presentá e anochi riba esenario i promé ku nan a kuminsá toka, a tuma un minüt di silensio. Esaki den felis memoria di Pandjuwa, e persona ku a kuminsá ku e banda FMK.

Durante e anochi kada komposishon a zona bon, kada un ku nan estilo i fanátiko, kada ken ku nan favorito.



Na Kaminda Pa Dia di Rincon



Traha pa Koninklijke Marechaussee: un desafío p'abo?

Bo ta fleksibel, sosial i desidido? I bo ke un trabou desafiante di kua kada dia ta diferente? Solisitá e ora ei komo kolaboradó Tareanan Polis di Frontera na Koninklijke Marechaussee.

Bo ta haña e desafío aki ta pas ku bo?

E ora ei tune-in pa nos seshonnan di informashon online via e página di Facebook di Rijksdienst Caribisch Nederland riba 15 di aprel, pa 5 or di atardi pa e seshon na Papiamentu i pa 6.30 or di atardi pa e seshon na Ingles.

Pa partisipá online no mester registrá. Pa mas informashon bishita www.rijksdienstcn.com.

Bòchi ta sendé pa Kanto Krioyo

KRALENDIJK -- Konosido siudadano di Rincon ku no mester di introdukshon ken e ta, a bisa ku e ta kla pa Kanto Krioyo 2025.

Bòchi a bisa un reportero di BONERIANO, miéntras e tabata huntu ku algun amigu na e promé anochi Festival Kanto Krioyo.

“Mi ta kla pa e festival i semper bon prepará. Mi ta gusta trese mi kosnan

krioyo dilanti, den un forma original, specialmente manera ántes. Asina e kos a kuminsá i mi ta mantené e tradishon. Esei ta mi kos i mi goso.

“Bòchi tei un biá mas sendé pa e públiko,” Bòchi a terminá bisando.

Riba potrèt Bòchi i su amigunan, opservando e kantikanan durante e promé anochi den Stadion na Rincon.



Ecuador ta e Colombia nobo?

E episentro kambiano di komersio di kokaina

KRALENDIJK -- Pa dékadan, Colombia tabata sinónimo ku e komersio global di kokaina. E tabata e lugá di nasementu di kartelnan, batayanan épiko entre outoridat i trafikantenan i e plataforma prinsipal pa droganan destino pa Europa i Nort Amérika. Pero den añanan resien, un cambio dramátiko

a sosodé. Miéntas ku violencia i kargamentunan di kokaina ta oumentá na un ritmo espantoso, hopi awor ta puntra, Ecuador ta birando e Colombia nobo? E kontesta, lástimamente ta si, por lo ménos den término di su sentralidat pa rutanen di tráfiiko global. Aunke Ecuador no ta produsí kokaina, kasi 70% di

e suministro mundial awor ta pasa atraves di su teritorio, segun Presidente Daniel Noboa.

Posishoná entre Colombia i Perú, e dos produktornan prinsipal, Ecuador ta ofresé aksesu stratégiko na Oséano Pasífiko, rutanen importante di nabegashon i un sektor di eksportashon legal

kresiente ku trafikantenan ta eksplotá pa skonde karga ilisito.

Loke un tempu tabata un pais relativamente stabil, a mira un oumento dramátiko den violencia di gèn, korupshon i infiltrashon kriminal estranhero, specialmente pa mafianan Europeo. Entre nan, e mafia Albanes a ankra su mes profundamente den e hafnan di Ecuador, retnan logístiko i asta institushonnan públiko. E gruponan akí ta uza kargamentunan di banana, entre otro eksportashonnan, komo kamuflahe pa kokaina, hopi biá estableciendo kompanianan falsu di importashon i eksportashon pa tapa nan pistanan. Guayaquil, e siudat di haf mas grandi di Ecuador, a bira un hotspot pa aktividat di narko. Na yanüari 2025 so, a registrá 781 asesinato, un refleho sinistro di e kompetensia violento entre gènnan di droga, tantu lokal komo estranhero. Polis i militar awor ta patruyá hafnan ku rifel di asalto. Ekiponan di buseadó ta sambuyá bou di barkunan di karga pa buska skonditenan di droga bou di awa. Apesar di e esfuersonan akí, kasi 300 tòn di narkótiko a keda konfiská aña pasá, un rekòrt haltu ku ta señalá ku ainda mas ta slep bai sin detektá.

Dikon Ecuador. E kontesta ta sinta den un tormenta perfekto di vulnerabilidad. E pandemia di COVID-19 a laga Ecuador e k o n ó m i k a m e n t e batí, ku oumento di desempleo i redukshon di presupuestonan públiko.

Esaki a krea un tereno fértil pa krímen organisá reklutá hóben i korumpí ofisialnan. Regulashon debil, eksperensia limitá di outoridatnan ku krímen transnashonal i polítika di visa anteriormente fleksibel, a permití trafikantenan Europeo infiltrá e pais ku fasilidat.

Pa Ekuatorianonan, e kosto humano ta devastador. Shofùr di trùk inosente, trahadó di haf i eksportadó di banana, ta keda gará den e interkambio di tiru, hopi biá fòrsá, tin biá matá, semper vulnerabel. Fiskal i abogadonan ku ta investigá lasonan di gèn ta enfrentá menasanan konstante. I famianan komun ta biba ku e miedu ku por reklatá nan yunan pa gènnan asina hóben ku 12 aña. Pero miéntas ku Ecuador ta karga e peso di e violencia, e kombustibel pa e kandela akí ta bin di eksterior. Oumento di demanda na Europa, partikularmente na Reino Uní, a hasi kokaina un di e importashon ilisito mas lukrativo di e kontinente. Outoridatnan Britániko ta kalkulá ku e merkado di kokaina di Reino Uní ta bal 11 bion lira, ku mas di 1,100 morto relashoná ku kokaina na 2023 so.

Manera ofisialnan Ekuatoriano, inkluyendo Presidente Noboa, a enfatisá, e lucha no mester keda hibá na Ecuador so. Progreso berdadero ta rekerí atendé demanda den nashonnan konsumidó i rekonosé ku e violencia na Guayaquil ta mará na liñanan di kokaina konsumí na London, Paris i Berlin.

Ecuador por ta e episentro nobo, pero e responsabilidat ta global.



Tribon di bayena mirá durante investigashon di koral


KRALENDIJK -- Investigadónan a hasi un opservashon spesial durante investigashon di ref di koral pa STINAPA. E tim a mira tribon bayena dos biá den un dia miéntas nan tabata sambuyá na dos diferente lokalidat rònt di Boneiru. “Mira un tribon bayena durante un buseo ta spesial, pero mira dos

diferente ehemplar na diferente lugá riba e mesun dia, ta un eksperensia berdaderamente úniko,” e investigadó Ramon de Leon, a bisa. Segun e, e bista straño akí ta enfatisá e status spesial di e mundu bou di laman di Boneiru.

Tribon bayena no solamente ta esun di mas grandi di tur tribon, pero

tambe e piská di mas grandi na mundu. E kos spesial ta, ku a mira tur dos piská na Kralendijk, dilanti di e resortnan djis nort i djis pariba di e sentro.

E bista akí un biá mas ta konfirmá Boneiru su status komo un di e mihó destinashonnan di buseo na mundu.



Tarifanan di Merka ta afektá teritorionan chikitu

K R A L E N D I J K -- Tarifanan nobo di importashon di Merka lo por tin konsekuensianan serio a korto i largu plaso pa ekonomianan insular chikitu manera Boneiru, Aruba i Kòrsou. Esaki ta loke e ekonomista di desaroyo, Rendell de Kort, ta skirbi. Aunke e efekto ta aparesé indirekto, e medidanan akí ta afektá sektornan fundamental di ekonomia, manera komersio, turismo i stabilitat di preis. Segun ku

importashon for di Merka ta bira mas karu, e kosto di kuminda i otro produktonan importá ta oumentá.

Pa islanan ku ta hopi dependiente di importashon, manera Boneiru, Aruba i Kòrsou, esaki ta nifiká un oumento di inflashon i un bahada di poder di kompra. Bida ta birando mas karu, miéntras ku salarionan hopi biá no ta subi proporsjonalmente. Ademas turismo ta sufriendo di e tarifanan nobo.

Merka ta un di e merkadonan mas importante pa turistanan ku ta biaha pa Karibe. Esaki ta e kaso na Aruba pa añanan kaba, miéntras ku na Boneiru i Kòrsou e kantidat di turista for di Norte América a surpasá esun di e merkado tradishonal Hulandes. Debí na e forsa di kompra ku ta bahando bou di konsumidónan Merikano, tin un bon chèn ku ménos hende lo por paga un fakansi pa Boneiru, Kòrsou, òf Aruba.

Esaki ta pone preshon riba entradanan di turismo, un sektor ku ta konta pa un parti signifkante di ekonomia.

E défisit komersial di paisnan manera Boneiru, Kòrsou i Aruba, tambe ta bin bou di mas preshon. Preisnan di importashon mas haltu ta oumentando e skarsedat, loke eventualmente por eroshoná e balor di e moneda lokal. E dependensia ekonómiko riba merkansia di afó ta hasié difisil pa estadonan insular kambia lihé.

Riba término mas largu, e desaroyonan akí por kondusí na un bahada mas aleu den eksportashon, un

debilitashon di gastunan doméstiko i un bahada den kresementu ekonómiko.

E interkonekshon di komersio mundial ta nifiká ku shòknan pa ekonomianan grandi manera Merka, tambe ta pasa pa merkadonan mas chikí i vulnerabel. Ekspertonan ta señalá ku gobièrnunan di estadonan insular chikí mester keda alerta pa desaroyonan eksterno asina.

Segun nan, ta importante pa desaroyá manehonan ku ta fortalecé resiliensia ekonómiko, por ehèmpel dor di stimulá produkshon lokal, òf buska partnernan komersial nobo.

Hetty Burgos a bai sosegá

Parke Wilhelmina ta di luto

K R A L E N D I J K -- Parke Wilhelmina ta di luto. E palomanan ku tur mainta ta buska wiriwiri di kuminda den e parke aki pa alimentá nan mes ta tristu. Nan amiga no t'ei mas. E konosido siudadano Hetty Yvonne Burgos a fayesé. Por a topa kuné durante hopi mainta sintá riba banki den e parke.

Hetty Burgos a nase na Kòrsou dia 3 di aprel 1949. Den añanan nobenta el a bin traha na Boneiru na GVI (Gezins Voogdij Instelling).

Pero komo mucha tambe el a biba algun aña na Boneiru, pa motibu ku su tata a bin traha komo selador riba e isla aki. Ta loke el a konta.

Hetty a hasi estudio komo trahadó sosial na Hulanda, na unda el a traha tambe despues den e sektor aki. Su promé trabou na Boneiru tabata na GVI. Despues el a traha na Servisio di Asuntunan Sosial (SASO). Tambe el a yega di traha na Fundashon Zr. Maria Höppner.

E último añanan di su bida Hetty a kombertí

su mes den un figura markante den Playa. Por a mir'è sintá kasi tur mainta riba banki den Parke Wilhelmina, rondoná pa palomanan ku tin biá e tabata duna kaminda.

Último lunanan por a konstata ku Hetty su kondishon tabata bayendo atras. E no tabata move masha mas den Playa i sinta riba banki den Parke Wilhelmina.

Hetty tabatin su sírkulo di amistad ku sigur lo sinti su falta. Ku su alma sosegá na pas. E tabata parti di Boneiru.



Hetty Burgos manera hopi lo keda rekòrd'è, sintá mainta den Parke Wilhelmina.

Kuentaso: Inspirá e siguiente generashon di lesadó

K R A L E N D I J K -- Bo ta un persona ku talento pa skirbi i bo ke inspirá e siguiente generashon di lesadó. E ora ei partisipá, kompartí bo idea i bo tin chèn pa duna bida na bo storia den un buki pa mucha ku lo publiká.

Bishitá e wèpsait www.rosestories.nl/spotlight pa mas informashon i pa registrá. Òf manda un e-mail na schrijfwedstrijd@rosestories.nl.

Kuentaso ta un kolaborashon entre Stichting Lezen en Schrijven Bonaire, Biblioteka Públiko Boneiru, Letterenfonds, Akademie Papiamentu, Entidat Públiko Boneiru i Rose Stories.

Huntu ta komprometé pa ku ayudo di Kuentaso, identifiká, enkurashá i sigui desaroyá talento nobo i alabes inspirá i motivá e generashon nobo di lesadó.

Temblor sintí na Boneiru

K R A L E N D I J K -- Servisio Meteorológiko Kòrsou ta informá ku djárasen atardi alredero di mitar di kuater, a tuma lugá un temblor ku un magnitud di 4.1 riba eskala di Richter.

E temblor a tuma lugá na un distansia di mas o ménos 40 kilometer sùit di Kòrsou. Servisio

Meteorológiko Kòrsou ta sigui vigilá e situashon i ta gradisí tur persona ku a yama i duna informashon. Interesante ta pa menshoná ku Boneiru tambe a sinti efekto di e temblor anunsia. Den e parti mas pariba di Boneiru, por ehèmpel den e área di Lagun, tin hende a sinti e temblor.

èxtra
...number 1

www.extraboneiru.com

Un speransa pa nan spesie

Mama turtuga di Galápagos di 100 aña a haña yu

K R A L E N D I J K / PHILADELPHIA -- Un notisia alentador a yega for di e parke di bestia di Philadelphia, unda un turtuga gigante di Galápagos di e spesie di wèst di Santa Cruz, ku ta den peliger di ekstishon, a bira mama pa promé biá na e edat impreshonante

di 100 aña. Ta mira e akontesimentu akí komo un logro signifikativo den e esfuersonan pa konservá e spesie vulnerabel akí.

E mama, kariñosamente yamá Mommy, ta un residente di hopi tempu di e parke di bestia yegando na 1932.

E i e tata, Abrazzo, tambe



di aproksimadamente 100 aña, a produsí kuater yu chikitu, tur embra.

E beibinan a nase dia 27 di febrüari i ta den bon estado di salú, kresiendo debidamente i ku un peso entre 70 i 80 gram. E nasementu eksitoso akí ta resultado di e plan di kria di e programa di sostenibilidat, SSP, di e asosashon di parke di bestia i akuario di Merka. E programa akí ta dediká na mantené e populashonnan di spesie ku ta kore peliger di desaparishon. Jo-Elle Mogerman, presidente i CEO di e parke di bestia di Philadelphia, a ekspresá su entusiasmo, bisando ku esaki ta un desaroyo importante den historia di e parke di bestia di

Philadelphia. El a añadi ku e speransa ta ku e generashon nobo akí di turtuga lo kontribuí na un populashon floresiente di turtuga di Galápagos riba un planeta saludabel den e próksimo 100 añanan.

Rachel Metz, vise presidente di Bienestar Animal i Konservashon, a enfatisá ku e beibinan turtuga no solamente ta protehá e spesie di ekstishon, pero tambe ta sirbi komo e embahadornan importante pa inspirá e bishitantenan pa salba bida di naturalesa i e lugánan natural. Ta importante pa menshoná ku promé ku e nasementunan akí, solamente tabatin 44 turtuga di wèst di Santa

Cruz den tur e parkenan di Merka. Ashley Ortega, kordinadó di SSP, a splika ku e beibinan akí ta representá un liña genétiko nobo i un ayudo hopi nesesario pa e populashon di e spesie. E turtuganan di Galápagos t'e spesie mas grandi di nan tipo. E machunan por pisa te ku 225 kilo, miéntras ku e embranan ta yega un promedio di 115 kilo. Nan ekspektativa di bida ta kalkulá entre 100 i 200 aña. Aktualmente, tin 13 spesie bibu nativo di shete di e islanan Galápagos.

E nasementu di e kuater turtuganan akí ta un paso positivo den e lucha pa sigurá e supervivensia di e spesie ikónico akí.

NTR ta disparsé despues reformashon di NPO

K R A L E N D I J K / HULANDA -- E emisoranan públiko lo konosé kambionan grandi for di 2029 padilanti. Minister Bruins di Media, a anunsiá esaki den un karta pa Tweede Kamer. E kier entre otro un redukshon grandi den e kantidat di emisora miembro.

E 11 emisoranan miembro aktual tambe mester traha estrechamente huntu organisatoriamente den kuater, òf komo máksimo sinku kas di radiodifushon, ku lo bira un parti permanente di e sistema.

E emisora NTR, ku no tin miembro, lo no keda inklui den un di e kasnan di transmishon, Bruins ta skirbi. Ainda lo elaborá riba kon e oferta di e emisora akí lo ta “garantisá.

E minister mes no kier usa e palabra abolishon: “Mi ta spera ku e programanan grandi lo keda.” NTR ta produsí programanan tokante arte i kultura, minorianan, hubentut, edukashon i periodismo di antesedente. Programanan bon konosí ta entre otro Het Sinterklaas Journaal, Nieuwsuur i Andere Tijden, tin biá den kolaborashon ku otro emisoranan.

Bruins ta bisa ku e ta konsiente ku esaki por tin konsekuensianan grandi pa empleadonan denter di NTR. E diesun emisoranan awor ta AVROTROS, PowNed, MAX, WNL, VPRO, Human, BNNVARA, KRO-NCRV, EO, ON i Zwart. Awor nan ta keda kontrolá kada sinku aña pa wak si ainda nan tin por lo ménos 100 mil miembro. E rasonamentu ta ku e kantidat akí mester representá un sirkunstansia supstansial i spesífiko.

Tambe lo ta bon pa e diversidat di e transmishonnan, den kua ta trata tur tipo di diferente movimentu i opinionnan kultural. Pero e sistema di transmishon aktual no ta funshoná mas, manera desénas di estudio a mustra den añanan resien.

“Pa gana sufisiente miembro, e emisoranan ta kompetí entre nan mes pa “nan visibilidat,” Bruins ta bisa. E kompetensia mutuo akí ta feros i e ta na kosto di diversidat.

Bruins ke pa mas bos di sosiedat keda skuchá den e sistema nobo di transmishon. “E sistema akí lo bira mas ankrá sosialmente.” Mester bandoná e kriterio di miembro

awor.

E minister kier garantisá diversidat den e sistema nobo dor di obligá e kasnan di radiodifushon nobo pa permití tur bos den sosiedat keda skuchá. Den su karta pa Tweede Kamer, e ta di akuerdo ku ta inevitabel ku e rango di programanan lo keda afektá, pasobra simplemente lo tin ménos opshon di transmishon den futuro.

Ménos maneho i personal

E idea ta ku pronto lo tin un emisora públiko mas efisiente, ku ménos kapa atministrativo i ménos personal. Segun e minister, esaki lo kondusí na mas kontròl riba programashon, ku tambe lo permití mas hende haña un kontrakt permanente.

“Un kantidat di medida ta afektá fundamentalmente kon e emisora públiko nashonal ta organisá,” Bruins ta bisa. “Esei tambe tin konsekuensia pa e hendenan ku ta traha einan, pasobra hopi kos ta bai kambia. Mi ta realisá esei. Pero si nos ke pa e emisora sigui, nos mester retené loka ta balioso i riska di kambia loka ta nesesario.”

Organisashonalmente

nada lo no kambia pa NOS. NOS i NTR ta asina yamá emisoranan di tarea sin miembro, pero ku un mandato legal. NOS mester sòru pa un provishon di notisia amplio i independiente.

Kiko NTR ta traha


Na 2010 a kreá NTR for di e emisoranan NPS, Teleac i RVU, di kua e inisialnan a forma e nòmber di e emisor nobo. Durante añanan, NTR a produsí desénas di programa, inkluyendo hopi programa pa mucha konosí manera Sesame Street, Het Klokhuis, Schooltv, PatsBoemKledder! i e revista di Sinterklaas. E Top 2000 à Go-Go tambe ta di NTR.

Huntu ku NOS, e emisora ta produsí tambe e programa di aktualidat Nieuwsuur. Otro titulonnan konosí ta inklui Andere Tijden, Podium Klassiek, Dream School, programa di siensia Focus i The Hour of the Wolf.

E seri di dokudrama históriko The Story of the Netherlands, a logra sifranan haltu di bista na 2022. NTR tambe ta produsí un kantidat di programa konosí i di hopi tempu pa radio, manera Kunststof i huntu ku NOS, Nieuws & Co. Direktor

di NTR, Lucas Goes, a reashoná ku shòk riba e plan di e minister. “E ta bini komo un bòm pa nos,” el a bisa. “Nos a asumí ku NTR lo a haña un lugá den un kas di tarea nobo formá den e sistema nobo.” Segun Goes, su emisora ta e wardadó di temanan ku lo a keda supeksponé sin NTR. “Tokante gruponan meta ku nos ta kore peliger di pèrdè for di bista i tokante tópikonan sosialmente relevante ku ta rekerí ophetividat.”

E karta di Bruins ta kousa hopi intrankilidat bou di empleadonan di NTR. “Nos mester di algun tempu tambe pa prosesá esaki komo un organisashon i pa wak kiko eksaktamente esaki ta nifiká pa nos,” Goes a bisa. “Nos no ta bai simplemente aseptá esaki.” E plan di Bruins no a kai for di shelu. Na 2023, un rapòrt krítiko riba e paisahe di transmishon fragmentá a keda publiká pa un hunta di konseho dirigí pa e polítiko anterior di CDA, Van Geel. Ya kaba a bisa ku mester tin un máksimo di seis asosiasion di radiodifushon. Algun di e plannan di Minister Bruins a lèk e siman ku a pasa via e AD. Siman pasá el a haña aprobashon di Konseho di Minister.



S.A. na Hulanda

Ami i mi mama a pasa en total 48 ora na Alemania Dusseldorf pa selebrá aña nobo. E anochi promé nos a sena na un restorant hopi apart ku yama Mezzomar. E ta un restorant Italiano ku tin kuminda hopi dushi. Pero loke ta apart di e restorant aki ta su lokashon. E restorant aki ta keda

meimei di un garashi di outonan klasikó. Bo ta sinta kome rondoná pa mas ku 200 outo. Mi ta kere kualke persona ku ta fásina ku outo lo gusta e lugá aki. Ta algu ku nunca mi a eksperensiá i no ta kere lo mi eksperensiá atrobe.

Úniko kos ku nos no



a gusta ta e echo ku nos a haña un mesero ku no tabata asina amabel. Nos a sinti ku ora e tabata papia e tabata grita nos i tabata papia di un manera ku no ta muchu agradabel, pero a pensa ku kisas esei ta e estilo ku alemannan ta papia i nan aksento. Mi a disidí di bai riba google, kaminda mas hende por laga komentario, i a ripará ku no ta nos so a eksperensiá esaki. Algun di e komentarionan tabata: “Staff was rude and unhappy. They acted like they did not like us from the first minute. Especially tall blonde waiter.” I di un otro persona: “My friend and I are Chinese. The waiter obviously discriminated again us” i tambe “I don't understand how such unfriendly staff can work in such a wonderful place! The man with long white hair is very rude!” Pues no tabata nos idea. Mas despues nos a haña un otro mesero ku tabata mas amabel.

Nos a bini pa selebrá aña nobo, pero loke ta mas prèt ta ku bispu di aña nobo mes nos no a hasi nada.

Nos a pasa 12:00 den kamber di hotèl. E anochi ei nos a wak un e shownan di vürwèrk i via nos bentana di kamber. Alemania ta un di e paisnan den Oropa ku ta produsí mas vürwèrk,

pues nos por a disfrutá di un show largu di vürwèrk for di nos bentana di kamber.

E siguiente dia ya kaba tabata tempu pa nos bai bèk Hulanda. Nos a lanta mainta bai desayuná na un kafé pegá ku nos hotèl. Mas despues nos a bai kana den un parke.

Prome ku mi a bin

Hulanda mi tabata preokupá ku si mi por disfrutá di naturalesa den friu. Aunke e ta diferente, mi ta gusta pasa mi tempu den naturalesa.

Nos a kana un ratu i mas atardi a kue ruta pa bai bek Hulanda. Esaki tabata un biahe kòrtiku, pero spesial. Asina mi a kaba e aña 2024.



Pelea entre dos hòmbèr riba kaminda públiko


KRALENDIJK- Djamars, 8 di aprel a surgi un pelea entre dos hòmbèr riba Kaya Korona, djis dilanti klup di Demokrat. Polis a yega na e sitio i a atendé ku e bringadónan.



Entre pikòp i outo di famia:

Aksidente Kaya Korona



KRALENDIJK- Ayera, 10 di aprel a tuma lugá aksidente entre un pikòp i un outo di famia. No tabatin herido, sí tabatin daño material. Esaki a sosede alredero di 1or di mèrdia riba Kaya Korona. Opviamente esaki ta un ora ku riba karetera ku ta basta drùk. Pues esaki tabatin konsekuensia riba e fluho di tráfiko.



MONCHI & TONCHI

Tonchi, bon ku nos no ta prensa. Sino tur hende lo ke sera nos boka..

Awèl sí, anto ta un gùm so nan mester pa silensia nos...



Yuda nos tene nos playanan limpi



www.extraboneiru.com

BACK IN STOCK

OPTENIBEL NA

- OFISINA DI EXTRA
- VAN DEN TWEEL SUPERMARKET
- DELMAR



FUHIKUBO
FUNDASHON HISTÓRIKO
KULTURAL BONERIANO
Yabi di pasado, porta pa futuro



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
avis: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcedencia

Redakshon
Papi Antoin
Edson Pietersz

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Maya Beaumont

Konsehero:
Bòl Antoin
786-6818

Aviso
avisobon@gmail.com

STATIA/SABA/ST. MAARTEN

Empoderando hende muhé pa medio di kosementu

PHILIPSBURG un sekshon denter di Famia i Asuntunan
– Women's Desk, Desaroyo di Komunitat, Humanitario, CDFHA,



Minister di Finansa ta topa Direktor nobo di Kadaster

PHILIPSBURG -- su funshon nobo komo Direktor ofisialmente. Adishonalmente, Minister di Finansa, Marinka Gumbs, Durante e reunion, Ortega a resientemente a tene proveé Minister di Finansa un reunion ku Hunta di ku un resúmen ku ta deliniá Supervishon i e direktor su ophetivonan klave i nobo di Kadaster, vishon pa Kadaster bai Benjamin Ortega. dilanti. Minister a ekspresá Entrante 1 di novèmber su sosten i a ekstendé e 2024, Ortega a asumí mihó deseonan na Ortega Kadaster.



ta orguyoso di anunsiá e kontinuashon di su programa di empoderashon di kosementu di hende muhé, ku a kuminsá ofisialmente dia 31 di mart.

E inisiativa di tres luna akí fasilitá pa Jo-Anhlon Leign di un parti integral di e departamentu pa esfuersonan kontinuo pa elevá i empoderá hende muhé pa medio di desaroyo di abilidadnan práktiko.

E programa ta konsistí di dos nivel di klas, kuminsá i avansá, kual tur dos a yena djis despues ku e foyeto a keda publiká, un testimonio kla di e interes abrumador di hende muhé den e komunidad.

Debí na demanda haltu, un lista di espera a forma kaba pa e siguiente klas, loke ta reflehá e programa su relevansia i resonansia fuerte bou di partisipantenan ku ta buska pa siña òf drecha nan abilidadnan di kose.

E programa a keda habrí ofisialmente pa Minister di Salubridat Públiko, Desaroyo Sosial i Labor, kende a entregá palabranan inspirador di enkurashamentu na e hendenan muhé presente.

E minister a enfatisá e importansia krítiko

di programanan di empoderashon basá riba abilidadnan manera esun akí, spesialmente den fortalés e independensia ekonómiko i personal di hende muhé.

“Momentu hende muhé ta keda empoderá ku abilidadnan, komunidadnan kompletu ta prosperá. E programa akí ta mas ku djis siña kose, e ta tokante reklamá konfiansa, fomentá kreativitat i krea oportunidatnan pa independensia finansiero,” asina e minister a bisa.

Kosementu ta mas ku un artesanía, e ta un abilidad sostenibel i komersialisabel, ku por kondusí na trabou propio, empresario i un fluho di entrada adishonal pa hopi hende muhé. Dor di ekipá partisipantenan ku entrenamentu práktiko i guia profeshonal, CDFHA ta sigui invertí den konstrukshon di komunidadnan mas fuerte i outosuficiente.

CDFHA ta ekstendé su gratitut na tur ku a inskribí i mustra interes den e inisiativa akí. E departamentu ta keda komprometé na desaroyá oportunidatnan den futuro pa mas hende muhé por partisipá na e programa sumamente buská akí.

Yuda nos tene nos playanan limpi



www.extraboneiru.com

KÒRSOU

Fortifikashon abilitatnan di coach lokal

WILLEMSTAD -- Resientemente, Ministerio di Desaroyo Ekonómiko a organisá un seri di training ku enfoke riba fortifikashon di abilitatnan di coachnan lokal. E iniciativa akí ta parti di e programa Biz2Biz, ku tin komo meta redusí burokasia i gastunan empresarial.

E trainingnan tabata

fasilitá pa Nelida Catalina, un coach ku eksperensia internashonal i Tsinatee Elisa, un hóben profeshonal eksperto di Kòrsou. Nan a enfoká riba mehorashon di téknikanan di coaching di negoshi i uso efektivo di LinkedIn, ku e propósito pa kapasidatá partisipantenan pa nan por eksportá nan servisionan

internashonalmente.

Meta di e seshonnan tabata pa desaroyá kapasidat lokal i promové ‘brain circulation’, kaminda konosementu i abilitatnan ta keda kompartí i fortifiká den komunidat.

Nelida Catalina a proveé partisipantenan téknikanan avansá di coaching dirigí riba mehorashon di

prestashonnan di negoshi na nan klientenan. E enfoke tabata riba desaroyo di informashon stratégiko, ofresiendo hèrmèntnan práktiko ku coachnan por usa pa asistí empresarionan chikí i mediano, MKB, di un manera mas efektivo. LinkedIn, un hèrmènt pa ekspanshon internashonal paralèl na e seshonnan di coaching, Tsinatee Elisa a dirigí un workshop di LinkedIn, kaminda partisipantenan a siña kon pa optimalisá nan profil pa amplia nan ret di kontakto profeshonal i promové nan servisionan internashonalmente.

E seshon práktiko akí a ofresé partisipantenan e oportunidat pa hasi mehorashonnan inmediato na nan propio profil di LinkedIn, ku e ophetivo

di oumentá nan visibilidat riba e plataforma global.

E trainingnan aki a keda risibí ku entusiasmo i a demostrá di ta un medio efektivo pa fortifiká signifkativamente e kapasidatnan di coachnan lokal. Ofresiendo e trainingnan akí, Ministerio di Desaroyo Ekonómiko no solamente ta apoyá kresementu profeshonal di individuonan, pero tambe ta stimulá resiliensia ekonómiko i inovashon den henter komunidat di Kòrsou. E iniciativanan akí ta posibel danki na e apoyo di Tijdelijke Werkorganisatie (TWO) i ta reflehá e kompromiso di MEO pa invertí den desaroyo di talentonan lokal i stimulá diversifikashon ekonómiko i komèrsio internashonal.



Eliminashon moratorio riba toko i minimarket

WILLEMSTAD -- Konseho di Minister a bai di akuerdo pa eliminá e moratorio riba toko i minimarket. Esaki ta nifiká ku e desishon pa no otorgá pèrmit di estableimentu pa toko i minimarket ta kaduká. E moratorio akí ta keda eliminá despues ku na òktober 2014 a introdusí esaki pa atendé ku iregularidatnan den e sektor akí.

Di akuerdo ku e desishon di Konseho di Minister, publiká 19 di mart, kada petishonario ku apliká pa habri un lokalidat ku ta bende produktonan di promé nesidat, mester tene cuenta ku e definishon konkreto ku ta konta pa e diferente tipo di lokalidatnan akí.

T distinguí e siguiente tipo di lokalidat ku ta bende produktonan di promé nesidat: Toko, minimarket,

supermarket, hypermarket i convenience store.

Pa por hasi petishon pa un pèrmit di estableimentu pa kualke un di e tipo di lokalidat ku ta bende produktonan di promé nesidat menshoná, ta rekerí pa entregá un kopia di e pèrmit di konstrukshon di e lokalidat, òf un kopia di e aprobashon pa hasi kambio di funshon di e lokalidat, manera por ehèmpel si e lokalidat ta un restaurant i e deseo ta pa hasi esaki un toko òf minimarket.

Paporevaluápetishonnan di pèrmit òf kambio di funshon di lokalidatnan ku ta bende produktonan di promé nesidat, e siguiente kategorianan ta keda distinguí:

Hypermarket

Un tienda grandi di servisio propio ku tin un área

di benta di mas ku 1000m2, kaminda aparte di ta bende produktonan di promé nesidat, otro artíkulonnan di entre otro kas, bibienda i komestibel tambe ta keda bendé. Algun produkto ta keda ofresé tambe na benta por mayor.

Supermarket

Un tienda di servisio propio ku tin un área di benta entre 400 pa 1000m2, mas chikí ku un hypermarket, ku ta bende produktonan di promé nesidat i tambe otro tipo di komestibel manera bèrdura fresku, pan, karni, bebida i artíkulonnan di kas. Artíkulo 1, insiso 4, di Legesverordening ta definí un supermarket komo un lokalidat ku ta ofresé servisio propio i ku tin mas ku dos kasa.

Toko/minimarket

Un tienda chikí ku tin un área di benta di ménos ku 400m2, ku prinsipalmente ta bende komestibel i un surtido mas chikí di otro artíkulonnan. Toko i minimarket ta tipo di negoshinan ku ta destiná pa sirbi kasnan den bisindario i por ta sea un tienda ku ta ofresé servisio propio, òf un tienda ku tin un lokèt kaminda klientenan ta keda asistí personalmente. Benta di alkohòl ta posibel. Artíkulo 1, insiso 4, di Legesverordening ta definí un toko òf minimarket komo un lokalidat ku ta ofresé servisio personal por media di un lokèt, òf un lokalidat ku ta ofresé servisio propio ku máksimo dos kasa.

Convenience store

Un tienda chikí ku tin un área di benta di ménos ku 100m2, kaminda ta ofresé entre otro kòfi, komestibel,

snèk, bebida, korant i revista, produktonan di tabako, artíkulonnan di baño i remedi ku ta den benta liber. Un convenience store por bende alkohòl i ta tipikamente situá na skina di kaya, na pòmpanan di gasolin, òf den áreanan turístiko. Hopi biá nan tin orario di benta ekstendé te den oranan lat di anochi òf 24/7, pa komodidat di nan klientenan.

E mesun definishonnan ta konta pa lokalidat ku ta bende produktonan di promé nesidat ku ta situá den un kompleho, manera un sentro komersial òf un kompleho turístiko.

Ministerio di Transporte, Tráfiko i Planifikashon Urbano den su evaluashon pa otorgá pèrmit di konstrukshon, ta tene cuenta ku lugánan di parkeo i otro faktornan riba tereno di planifikashon urbano.

DEPORTE

Karedanan di 'MTC Engineering Spring National' na SGMP

Fittipaldi Pietersz a kompetí den dragrace na Merka

KRALENDIJK -- Fittipaldi Pietersz fin di siman ku a pasa a pusta ku motosaikel na South Georgia Motorsports Park. Ya pa hopi aña Fittipaldi ta pusta na e pista na Merka i karedanan organisá pa Manufacturers Mancup Racing.

Fittipaldi ta konta su eksperensia di e karedanan: "Generalmente a bai bon. Normalmente tin un tèst for di djaweps pa specialmente hendenan ku motosaikel nobo, òf si a hasi cambio pa nan por tèst. Esaki pa motibu di mal tempu no a tuma lugá. Djabièrnè mainta tabatin oportunidat pa tèst, mi a probechá mas tantu posibel, loke tabata importante pa mi. Esaki debí ku mi a hasi diferente cambio na e motosaikel, pues tèst tabata nesesario."

Djabièrnè atardi lat tabata klasifikashon i el a bai kasi serka di loke Fittipaldi a pensa. Djasabra tabatin un tèst den kada



kategoria i nan a bai bon i atardi lat riba e mes un dia el a gana e promé kareda den e kategoria di Pro ET. E mesun atardi el a pèrdè e promé kareda den e kategoria di Street ET.

Djadumingu, Fittipaldi a bolbe pèrdè den e kategoria di Street ET i gana den esun di Pro ET, ku no ta un kategoria fásil, den su kaso ku su motosaikel. Den e kategoria nan ta uza tur

sorto di kos elektróniko, djis un ehèmpel nan ta usa sistema di klùch outomátiko i kos ku ta kontrolá e lus na salida, pues e shofùr praktikamente mester solamente tene stür i e sistema di kòmputer riba e motosaikel ta hasi tur kos.

Den su kaso, e mester hasi tur kos manual i esei ta rekerí hopi esfuerso pa un bon salida, ku mayoria biá, no ta meskos kompará ku esun outomátiko. Un koredó di motosaikel ta komprondé mas fásil kiko esei ta nifiká.

Di tur manera asina e kosnan a bai i Fittipaldi a pèrdè e di tres buèlta tambe. E ta konforme ku e

resultado, apesar ku su parti kompetensia no tabata asina fuerte. E sa kiko ta e kosnan ku e mester duna atenshon i pe ta mas kompetitivo e siguiente kareda. Fittipaldi: "Mi sa ku e koredónan na Merka ta hopi bon i si bo no ta stabil, bo no ta gana nan. Fittipaldi Racing Bonaire ta yama danki na INDEBON/Gobièrnu di Boneiru, NAPA, Premier Batteries Platinum na Merka, pa mi biaha pa Valdosta, Georgia, tabata posibel i e kompetensianan. Algun potrèt di ami i e motosaikel durante wikènt ku a pasa na Adel, South Georgia Motorsports Park."



Yuda nos tene nos playanan limpi



www.extraboneiru.com

DEPORTE

Delegashon Isla Riba a yega pa weganan eskolar

E delegashon di Sint Maarten, Sint Eustatius i Saba, huntu ku Diputado Eviton Heyliger i tambe Minister Sitrhee van Heydoorn, a yega Boneiru pa weganan eskolar interinsular. E weganan ta tuma lugá e fin di siman akí den diferente ramo di deporte.



MOVE FORWARD

X7 PLUS

7-Seater



\$26,995

CHANGAN

dabboussi

SERVICE & PARTS
GUARANTEED

+

5 YEAR
WARRANTY

f /dabboussimotors

701.6463